



Služba za saobraćaj, stambeno-komunalne poslove i građenje

OPĆINSKO VIJEĆE ILIJAŠ

**Odgovori na vijećnička pitanja i inicijative sa 27. sjednice Općinskog vijeća Ilijaš  
održane dana 30.01.2019.godine**

Ilijaš: Februar 2019.godine

Inicijativa: "Pokrećem inicijativu prema nadležnoj općinskoj službi, općinskom komunalnom inspektoratu i komunalnom preduzeću "RAD", da nađu lokaciju za premještanje posuda za odlaganje kućanskog otpada (kontejnera) sa lokacija u ulici "Žrtava genocida u Srebrenici" koji se nalaze neposredno ispred ulaza u Osnovnu školu "Podlugovi". Obrazloženje: Pomenuti kontejneri se nalaze neposredno do ulaza u školsko dvorište na autobuskoj stanici iz kojih izlazi neugodan smrad pogotovo u ljetnom periodu. Osim toga, su i ne savjesni građani koji svoj kućanski otpad ostavljaju pored predviđenih posuda kojeg psi lutalice raznose po cijelom školskom dvorištu. Često možemo vidjeti da se pored tih kontejnera odlažu i stabljike biljaka i grane voća kad se čiste vrtovi, voćnjaci i avlije. Sad u zimskom periodu tu je jedna velika deponija odlaganja pepela od sagorjelog čumura koji se koristi za ogrijev u domaćinstvima i to će predstavljati veliki problem ako se ne ukloni na vrijeme jer nam dolazi za koji mjesec proljeće i proljetni vjetrovi koji će taj pepeo raznositi po zraku što može uticati ozbiljno na zdravlje djece i izazvati određene zarazne bolesti. Zbog svega ovog navedenog, roditelji su s razlogom zabrinuti za zdravlje djece koji insistiraju da se kontejneri premjeste na drugu lokaciju i ovaj problem riješi u što kraćem roku".

Odgovor: Općina Ilijaš je u prethodnom periodu zajedno sa KJKP "Rad" d.o.o. Sarajevo-RJ Ilijaš pristupila uvođenju dvolinijskog sistema prikupljanja kućnog otpada na području MZ Lješevo, MZ Ljubnići i MZ Misoča. Projekat podrazumijeva nabavku i podjelu domaćinstvima PEHD kanti u crnoj boji za komunalni otpad i PEHD kanti u žutoj boji za reciklažni otpad. Planiran je nastavak realizacije ovog projekta na području MZ Podlugovi u 2019. godini što će rezultirati rješavanjem problema koji su evidentirani neposredno ispred ulaza u OŠ "Podlugovi" u Podlugovima.

AKIF BEŠLIJA – vijećnik SBB-a

Pitanje: "Postavljam pitanje nadležnoj općinskoj službi zbog čega nije izvršeno čišćenje snježnih padavina do naselja Korita, MZ Ljubina, na koji način se vrši kontrola i nadzor nad izvođačima radova koji su zaduženi za čišćenje snijega? Također želim da mi dostavite koliko puta je u ovom periodu izvršeno čišćenje snijega do ovog naselja? Obrazloženje: Svjedoci smo fotografija i snimaka na društvenim mrežama iz ovog naseljenog mjesta u kakvom stanju se nalazi putni pravac pram ovom naselju, zbog snježnih padavina. Podsjećanja radi, želim upoznati nadležnu službu da su Korita naseljena sa stanovništvom koje se isključivo bavi stočarstvom i uzgojem stoke gdje isti uzgajaju minimalno 600 komada ovaca. Ovaj vremenski period je poznat po reprodukciji i jagnjenju ovaca, gdje je u nekim slučajevima potrebna intervencija veterinara. Osim toga, potrebno je obezbijediti prihranu gdje ni u jednom ni u drugom slučaju nije moguće zbog neprohodnosti puta. Dalje, želim napomenuti da je i život osoba koji gore žive ugrožen iz razloga što isti ne mogu doći na ljekarske preglede, a samim tim ni kupiti lijekove koji su im propisani, a da ne govorimo o tome da se desi neki hitan slučaj gdje hitna pomoć ne može doći. Prema informacijama kojim raspolazem, a i lično sam se uvjerio, ovaj je put jednom ili dva puta očišćen, ali ne do gore navedenih stanovnika što istim ništa ne znači. Želim da mi po mogućnosti odgovor na ova pitanja bude dat na ovoj sjednici, jer je naredna sjednica daleko da se raspravlja o ovoj problematiki".

Odgovor: Mašinsko čišćenje snijega na putu za selo Korita vrši se po potrebi i do sada je izdato četiri Naloga za čišćenje. Mašina "Unimag" je čistila snijeg u slijedećim danima: 19.12.2018.g.; 06.01.2019.g.; 12.01.2019.g. i 27.01.2019.g.

ALAN ŠERAK – vijećnik SDP-a

Pitanje: "Upućujem pitanje općinskom načelniku vezano za odabir izvođača radova na izgradnji cesta, a tiče se novog stambenog naselja (Regulacionim planom definisan kao Alića Gaj). Svjedoci smo da se gore vrše određene radnje, pa me zanima ko je firma koja je dobila poslove i način na koji je ista odabrana. Ako može, molim vas, da mi se odgovori na sjednici".

Odgovor: U naselju Alića Gaj su izvođeni radovi na izgradnji vodovodne, kanalizacione, plinske i telekomunikacione mreže. Sva infrastruktura je polagana u trup saobraćajnice koja je morala biti stalno prohodna. Firma "Halilović"d.o.o.Ilijaš je izvodila radove prema Okvirnom sporazumu i Ugovoru o nasipanju dionice puta A1-A6 po projektu i Regulacionom planu "Alića Gaj".

SEMIR DEDIĆ – vijećnik SDA

Inicijativa: "Pokrećem inicijativu prema općinskom Načelniku i nadležnoj Službi da za narednu godinu prilikom raspisivanja nabavke za čišćenje snijega i održavanje puteva (zimsko), predvidi jedan LOT koji će se odnositi samo na čišćenje trotoara. To čišćenje trotoara treba da se odnosi na trotoare na području cijele općine Ilijaš, a ne samo na trotoare u gradu Ilijašu. Napominjem da se prilikom izrade tenderske dokumentacije obavezno uvrsti jasno definisani uslovi i dokazi da potencijalni ponuđači posjeduju u svom vlasništvu ili imaju ugovor o iznajmljivanju potrebnih sredstava za zimsko održavanje i čišćenje trotoara. Mislim da ćemo na osnovu svega gore navedenog izbjeći konstantna pitanja i žalbe u vezi sa čišćenjem trotoara".

Odgovor: Poseban LOT je i do sada postojao za mašinsko čišćenje trotoara, pješačke zone i pješačkih staza na području općine Ilijaš i obuhvatao je slijedeće mjesne zajednice: MZ Malešići, MZ Ilijaš Stari, MZ Ilijaš Grad, MZ Podlugovi i MZ Lješevo. Za proširenje obima čišćenja snijega sa trotoara na području cijele općine Ilijaš potrebno je planirati dodatna finansijska sredstva u općinskom Budžetu.

Služba za saobraćaj,  
stambeno-komunalne poslove i građenje